

白雲齋詩稿

雨夜懷人

窗外雨瀟瀟，寒風似浪潮。
京城歸路上，可濕紫羅綃？

小別有寄

未睹紅顏面，三朝抵月年。
夜深人不寐，簾外一星懸。

詠螢火蟲

孤懷託松柏，明滅自悒悒。
莫道螢光小，猶懷照夜心。

伊人傷心有寄

美人何事蹙蛾眉？視若明珠卿莫疑。
嗟我天生言語拙，惟將情思吐成詩。

淡水捷運站偶作

思如細雨亂紛紛，飄落淡江興水紋。
隔岸青山解人意，亦延薄霧作氤氳。

慰伊人

風雲多變原難測，朝露人生不可猜。
惟效莊周豁胸臆，莫教明鏡惹塵埃。

雨後

天霽獨行過野村，翩翩社燕偶寒暄。
昨宵縱有風雷作，碧水終無一點痕。

觀電影「藝伎回憶錄」有感

飄搖不定陌間塵，輾轉名流夕復晨。
藝伎生涯如枕夢，堪憐帶淚一枝春。

觀電影霍元甲有感而作

天滋萬物無高下，何必營營魁首名？
山氣盈懷有真意，且聽流水說分明。

購書乏錢有感

琳琅典籍漫相連，招我淹留細細研。
斟酌百回刪不盡，囊中總缺買書錢。

穀雨後見所植之蘭初長花苞

天生玉骨比西施，不與群芳競展姿。
爲報東君憐惜意，悄然相許在來期。

採桑甚

紫紅小果滿柔枝，正是騷人採擷時。
三徑情懷同五柳，清風拂面惜相知。

師大路送別

青燈幾盞映紅樓，夜近三更冷似秋。
小巷人歸高閣後，一城煙雨帶春愁。

油桐花步道口占

漫沿小徑入幽林，佇看油桐養素心。
萬事都隨花落去，靜聽山鳥嘯清音。

登擎天崗

山崗曠遠豁吟眸，春草離離翠欲流。
廓落襟懷接天地，紅塵順逆一時休。

讀沈園二首感賦用放翁韻

其一

水阻藍橋夢亦哀，一花一柳憶春台。
憑詩想見銷魂色，噙淚園中去復來。

其二

一入沈園思昔年，臨橋依舊恨綿綿。
丁香百結倩誰解？獨對清波徒惘然。

夜思

風前獨立袂翻飛，遙望街中燈影微。
欲把相思寄明月，清光流蕩照君歸。

遠距教學後戲題絕句

何須負笈越千山，憑鍵沉吟典籍間。
他日光纖滿絲路，春風可度玉門關。

詠文竹並序

余無地種竹，乃植文竹一盆，小巧玲瓏，可堪把玩，雖無竹之高大，
，然有竹之風雅，堪解無竹之憾也。

挺立小樓東，迎曦沐暖風。
窗邊影疏淺，盆裡碧玲瓏。
非竹亦懷節，養心焉屈躬？
新芽抽地起，高志向蒼穹。

遊基隆忘憂谷

地僻少人行，幽蹊春草生。
紅花開復落，粉蝶去還迎。
尋徑登峰頂，臨風聽海聲。
飄然意高舉，塵土等浮名。

經魚路古道見二空石屋有作

深山杳人跡，魚路著苔痕。
草蔓殘簷上，蟲鳴老樹根。
黃花綻無主，青竹立迎暉。
百載須臾逝，興衰誰共論？

龍門海濱公園騎自行車有作

初春天氣冷還溫，輕騎迎風一路奔。
青髮飛揚神亦動，雪濤翻捲韻長存。
深情花蝶舞身側，愜意林禽鳴海垠。
到此塵囂都遁去，雙車相逐過龍門。

陽明山賞花

煙雨迷濛小徑幽，塵寰暫避此勾留。
杜鵑嬌艷隨風舞，櫻樹繽紛入眼收。
幾縷山嵐偶縈岫，滿園花色正銷愁。
平生難得清閒日，忻出樊籠不羨侯。

於清境農場見梅花一株立於山巔因以賦之

為避紅塵立僻巒，嶙峋瘦骨抗霜寒。
冰綃一襲白於雪，香氣半絲幽比蘭。
飄逸閒雲日相訪，翩然野鶴偶同歡。
孤芳自有靈均志，豈肯飄零入濁湍？

回鄉感懷

久離梓里爲謀糧，驚見椿萱鬢染霜。
昔日田疇成廣廈，今時店肆燦金光。
漫聽左右鄰人事，聊說詩書錦繡章。
髮尙青青心已老，沉吟月下感滄桑。

經魚路古道

一入荒途別有天，青蔥古木自連綿。
徐行偶看苔痕綠，小憩時聽鳥囀妍。
流水真堪滌塵慮，浮雲當合作詩箋。
林間領略東山趣，瀑態花姿正萬千。

雨日觀潮

鯤攪滄溟起巨濤，騰驤萬馬氣雄豪。
狂潮千里拍天響，淒雨一時如鬼嘈。
遙想錢塘江水勢，復思太白筆端毫。
岩前小立生奇志，欲釣蓬萊島下鰲。

雨日登石門水庫高臺遠眺

石門芳草潤，大壩隔紅塵。
碧綠潭中水，悠閒臺上人。
憑欄望遠岫，擎纛對昏旻。
淪淪東雲至，瀟瀟斜雨陳。
須臾起山霧，浩淼漫天垠。
開合姿多變，乾坤意自伸。
臨風納靈氣，放眼不勝春。

乘車見禮儀不存有感而發

火車千里入站來，人群洶湧待門開。
廂中旅客猶未下，車外行人競前推。
可憐孱弱一老婦，迫退踉蹌如幼孩。
幸有善士扶之走，方免瘦骨承此摧。
悲哉禮儀不復古，只避車中站立苦。
孟云惻隱皆有之，奈何今人心已腐。
邦亂由微見其大，豺狼橫路豈須驚？
君不見盜賊殺人眼不眨，血事朝朝見螢屏。
更有相逢未相識，突遭刀剮鼎鑊烹。
鬱鬱壘塊梗胸臆，瀟瀟風雨籠蓬瀛。
勸君日飲千杯酒，莫作人間獨醒生。